



數念苦棟花

會用對待貼心的彼款專情，去斟酌看苦棟，彼是因為「苦棟若開花」這條歌。紀乃菡小姐優美的歌聲，將莊柏林先生的詩詞，唱得甲足有感情，嘛予我深深感動。就按呢，苦棟茄仔色的花蕊，就變做我逐年春天掛念的對象。毋但是佇校園內欣賞伊的嬌，街路邊、溪仔墘、駁岸頂、山林內，我攏會刁工去走揣伊的形影。

苦棟的花細細蕊仔，淺淺的茄仔色，規撮生做伙。二月底花恰葉同齊發出來。若無專工去看，是啥物都看袂著。伊清芳的氣味，無像玉蘭、茉莉遐爾野芳，著愛倚近才鼻有。全這陣也有色水豔麗閣大蕊的斑芝，恰顯目的風鈴木咧開花，大多數的人干焦看見佢的存在，較少人會去注意幽雅的苦棟。其實，茄仔色幼秀的苦棟仔花，恬恬開佇咧藍藍藍的三月天，往往予人產生一種和諧安祥，有夠幸福的感覺。這是佇別種花看袂著的氣質。我這款的熱情，免不了會感染四箍輾轉的同事、學生，這馬嘛知欲去欣賞春天的苦棟仔花。逐家相招沉迷茄仔色的花芳當中，確實誠有意思。

三月底四月初，天氣漸漸轉燒熱，葉仔愈生愈茂，毋過這陣，花蕊煞著愛離葉離枝，隨風搖、隨雨落。有當時仔看甲誠毋甘，想欲做彼號痴情的葬花人，煞真驚去予人笑痞的，只好共這份深情園佇咧心肝底。無奈來看伊墜落紅塵，化為烏有。唯一會當做的，是一擺閣一擺來聽彼條歌……。

苦棟是臺灣原生種的樹欖，一四界攏會當生存，認份、堅強，無需要特別照顧。春天開花滿滿是、熱天葉仔發真茂、秋天樹子結規欖、寒天落葉等過年，四季有無全款的面貌，其實是足嬌的樹種。可惜號名苦字，煞得袂著人疼痛，一般人家的埕斗，根本無伊生存的空間。致使我這個市內松，一直到讀著「苦棟若開花」這首詩，才恰伊結緣。

一冬軀軀長，苦棟仔花干焦開半個月，目一瞞就消失去，莫怪我會數念，期待年年春天會當再相會！

作者：林滿足

☆詞彙學習☆

【斟酌】tsim-tsiok：注意，特別仔細專注做某事。

【苦棟】khóo-līng：苦苓、苦棟子。木本植物，葉子呈羽狀複葉，前端尖銳，靠近葉柄呈圓形，每年五月下旬開紅白色花。

【茄仔色】kiô-á-sik：紫色。

【駁岸】poh-huānn：堤防、河堤。沿河或海邊修築的高岸，用以防水患。

【刁工】thiau-kang：又唸作 tiau-kang。專程、特地。

【專工】tsuan-kang：特地、專程。

【幼秀】iù-siù：秀氣。形容長相纖細、骨架小或氣質優雅。

【埕斗】tiānn-táu：院子。

【松】sōng：土裡土氣、傻裡傻氣、俗氣。